



# PREZIDÉNSIA KONSELLU MINISTRUS

VII GOVERNUN KONSTITUSIONÁL

## KOMUNIKADU IMPRENSA

### Sorumutuk Konsellu Ministrus loron 4 fulan-outubru tinan 2017

Konsellu Ministrus hala'o sorumutuk iha kuarta-feira ne'e, loron 4 fulan-outubru, ho membru hotu Governu Konstitusionál VII, iha Palásiu Governu, iha Dili, hodi [analiza Programa Governu nian](#) no Matadalan ba Implementasaun. Programa ne'e sei apresenta ba Parlamentu Nasionál, hafoin aprovasaun iha sorumutuk estraordinária, ne'ebé tau ona iha agenda ba sesta-feira.

Ministru iha Prezidénsia Konsellu Ministrus, Adriano do Nascimento, ne'ebé koordena ho ekipa téknika iha elaborasaun projetu nian, halo apresentasaun ba servisu ne'ebé dezenvolve ona no konteúdu dokumentu nian.

Programa Governu Konstitusionál VII nian sei kumpri ba Planu Estratéjiku Dezenvolvimentu (PED) 2011-2030 no ba Objétivu sira Dezenvolvimentu Sustentável nian iha tinan lima oinmai, ne'ebé hatuur iha pilár fundamentál haat: setór sosiál, dezenvolvimentu infraestrutur sira, setór ekonómiku no governasaun di'ak no reforma institusionál, ho objetivu sira ne'ebé maka define ona ba setór hirak-ne'e.

Ba setór sosiál, Governu iha ninia objetivu sira: asesu ba ensinu ne'ebé iha qualidade ba ema hotu, asesu ba servisu saúde ho qualidade ba ema hotu, fó apoiu ba ema vulnerável sira, dezenvolvimentu sustentavel ba jersaun sira hotu, indústrija kreativa vibrante no foin sa'e sira ne'ebé iha saúde di'ak, matenek no ho valor étiku nian sira.

Ba dezenvolvimentu infraestrutur sira, estabelese ona objetivu hirak tuirmai ne'e: hasa'e kapasidade produtiva no aumenta poténsia PIB, hadi'a asesu servisu ba ema sira no hadi'a sustentabilidade.

Objétivu sira ba setór ekonómiku nian mak: aumenta produsaun agríkola, dezenvolve indústrija rekursu natural sira, aumenta rendimentu liuhusi kriasaun empregu, no ambiente favorável ba diversifikasaun ekonómika nian.

Nune'e, objetivu sira ne'ebé maka fiksa ona ba governasaun di'ak no reforma institusionál maka: garantia



Palácio do Governo,  
Avenida Presidente Nicolau Lobato,  
Dili, Timor-Leste

pcm.gov.tl@gmail.com  
(+670) 33 310 608

ba defeza, seguransa no estabilidade nasional sira, garantia ba sistema justisa ida ne'ebé asesu-belek (asesível) no efetivu, integrasaun no pozisionamentu global sira Timor-Leste nian, reforsu ba kultura demokrátika liuhusi responsabilizasaun no transparénsia nian, no jestaun husi setór públiku ne'ebé efetiva, efisiente no responsavel.

Hafoin apresentasaun Ministru iha Prezidénsia Konsellu Ministrus nian, ekipa Unidade Planeamentu, Monitorizasaun no Avaliasaun husi Gabinete Primeiru-Ministru apresenta Matadalan Implementasaun Programa nian, ne'ebé, define atividade sira hodi apoia ezekusaun polítika no objetivu sira nian ne'ebé estabelese ona iha Programa Governu VII, tuir meta sira PED nian ne'ebé hala'o ona to'o agora, husi setór sira.

Ministru Adjuntu Primeiru-Ministru nian ba Delimitasaun Fronteira sira, Agio Pereira, halo **pontudesituasaun ida kona-ba negosiasaun sira Komisaun Konsiliasaun ba delimitasaun ketan tasik (fronteira marítima) país nian**, ne'ebé sai hanesan tema ida ba [komunikadu imprensa, iha loron 1 fulan-setembru, Tribunál Permanente Arbitrajen nian](#), ne'ebé maka hala'o hela.

Konsellu Ministrus aprova ona mós, iha sorumutuk ida-ne'e, nomeasaun **Sekretáriu Rejionál Adjuntu sira Autoridade Rejiaun Administrativa Espesiál Oekusi Ambenu nian**. Arsénio Bano hetan nomeasaun nu'udar Sekretáriu Rejionál Adjuntu ba Apoiu iha Koordenasan Área Sosiál no Administrasaun, no Leónia Costa Monteiro nu'udar Sekretária Rejionál Adjunta ba Apoiu iha Área Finansas no Dezenvolvimentu Ekonómiku. **REMATA**

